

◆ Dolasila - Impresciuns ladines contemporanes

Incö venerdì 15 de forà 2013, dales 18.30 ales 19.30 pîta le Mart, le Museum d'Ert Moderna y Contemporana da Trënt y Rorëi en colaboraziun cun la Lia Culturala Fanes na ocasiun de incuntada cun l'ert ladina contemporana y cun la tradiziun milenara dles Dolomites

La musiga y la usc dl soprann Susy Rottonara, i tesé de Roland Verra y les operes d'ert (pitôres y scoltôres) de Rott (Lois Rottonara) condüj le publich tres fora por l'atmosfera affascinanta dles liëndes ladines. Dolasila é na istalaziun, n evënt multimedial de artiséc ladins che é dedicada ales liëndes ladines te na incuntada danter ert figurativa, musiga y leteratôra. Le titul se referësc ala figôra de Dolasila, la protagonista dla liënda de Fanes, le poem epich zentral tla tradiziun dla jënt ladina encêr le Sela. Les proieziuns video che se presentëia sciöche scenografia dl evënt é tutes fora dal Poem Musical Fanes y dal film Le Règn de Fanes, premià a nivel internazional, adôm a chedri scenics depênc da Rott. I artiséc se tol dant da presentè cun l'istalaziun i puné fundamentai fora dala liënda de Fanes tres la prospetiva dla protagonista, tignin cunt dla zentralité dles figôres feminiles tla tradiziun dles liëndes ladines incé aladô de epoques matriarcales, dl "tëmp d'or", cotan denant dales testimonianzes scrites sura la jënt ladina.

L'evënt gnarà alesti tl foyer dl Mart. La lerch zentrala dl museum devënta insciö na cassa

de risonanza por les musighes scrites da Susy Rottonara, premiades plü iadi a nivel internazional.

Le proiet, coordiné da Gabriele Lorenzoni, gnarà stlüt jö cun n moment de incuntada tl Setur didatich dl Mart, da olache al é metü fora Dolomiteslego, na istalaziun da corusc, ideada da Ermanno Zulian. Ara se trata de n plastich metü adôm da 9 mituns de Fascia danter i 14 y i 16 agn cun 50000 töt de Lego. Na picia, gran costruziun por zelebré les Dolomites patrimoine mondial dl'Unesco y por sottrissé la belëza dl monn ladin cun n lingaz spontann y universal, chël dl jüch.



**Ert
ladina tl
museum
Mart.**